



REPUBLIKA E SHQIPËRISË
GJYKATA E SHKALLËS SË PARË TË JURIDIKSIONIT TË PËRGJITHSHËM
TIRANË

Nr. 920 Akti

Datë Regjistrimi 04.07.2024

Nr. 5934/11 Vendimi

Datë Vendimi 19.07.2024

VENDIM

**“Mbi mospranimin e depozitimit të Akteve në Regjistrin e Organizatave
Jofitimprurëse”**

Gjykata e Shkallës së Parë të Juridiksionit të Përgjithshëm Tiranë e përbërë prej
GJYQTARE: ESMERILDA HABILI

sot më datë 19.07.2024, mori në shqyrtim kërkesën nr. 920 akti, datë regjistrimi 04.07.2024, që i përket:

KERKUES:

Komiteti Olimpik Kombëtar Shqiptar (KOKSH), përfaqësuar nga Presidenti z. Fidel YLLI, dtl. 01.09.1962, i lindur në Tiranë, banues në Tiranë, Rr. "Liman Kaba", Parku Olimpik, Tiranë, mbajtës i letërnjoftimit nr. G20901138Q.

OBJEKTI:

Depozitimi dhe regjistrimi i Vendimit dt. 29.06.2024 të Asamblesë së Përgjithshme Vjetore të 30-të të Komitetit Olimpik Kombëtar Shqiptar (KOKSH).

BAZA LIGJORE:

Kushtetuta e Shqipërisë; Ligji Nr. 8789, datë 07.05.2001 "Për regjistrimin e organizatave jofitimprurëse", i ndryshuar; Ligjit Nr. 8788, datë 7.05.2001 "Për organizatat jofitimprurëse", LIGJI Nr. 79/2017 "Për sportin", i ndryshuar, si dhe Ligji 80/2021 "Për regjistrimin e Organizatave jofitimprurëse"

Gjykata pasi shqyrtoi në tërësi aktet bashkangjitur kërkesës, vendimin datë 29.06.2024 të Asamblesë së Përgjithshme të Komitetit Olimpik Kombëtar Shqiptar dhe aktet e regjistruara pranë Zyrës së Regjistrimit të Organizatave Jofitimprurëse,

VËREN:

Komiteti Olimpik Kombëtar Shqiptar (KOKSH) është person juridik, i krijuar në formën e shoqatës, regjistruar në Regjistrin e OJF-ve me vendimin Nr. 5934, datë 22.06.2018 të Gjykatës së Rrethit Gjyqësor Tiranë, e cila ka qëllim të promovojë dhe të mbrojë Lëvizjen Olimpikë në Shqipëri në përputhje me Kartën Olimpikë. KOKSH vepron në përputhje me dispozitat e Kodit Civil, Ligjit Nr.8788, datë 07.05.2001 "Për Organizatat Jofitimprurëse", Kartën Olimpikë, Ligji Nr. 79/2017 "Për Sportin" si dhe akte të tjera ligjore dhe nënligjore që rregullojnë këtë fushë të veprimtarisë së saj.

Në vijim të veprimtarisë së tij, në Asamblenë e Përgjithshme Vjetore Nr. 30 të datës 29.06.2024, KOKSH, në bazë të rendit të ditës, ka marrë vendimet si më poshtë vijon:

1. Ratifikimi i vendimeve të marra në Asamblenë e Përgjithshme Nr.29 të datës 2 Dhjetor 2023;
2. Ndarja e Cmimeve "Urdhër Olimpik";
3. Miratimi i Raportit Auditues për vitin 2023;
4. Miratimi i buxhetit për projektin "Ekipet Sportive në Shkolla", duke përfshirë:
 - a. Miratim e rialokime buxhetore për 2023-2024;
 - b. Miratimin e buxhetit për 2024-2025
5. Pranimi i organizatave sportive të reja pranë KOKSH:
 - Federata Shqiptare e Sporteve Elektronike
 - Shoqata Kombëtare e Regbisë
 - Shoqata Kombëtare e Fencing
 - Shoqata Kombëtare e Kolombofilëve
 - Shoqata Kombëtare e Triathlon Albania
 - Shoqata Kombëtare e Surfing
6. Votim për zgjedhjen e një anëtari e Komisionit të Verifikimit dhe Etikës (KVE), pas dorëheqjes së Znj. Klementina Caushaj.
7. Votimi për zgjedhjen e 11 Arbitrave të KAS.

Sa më sipër, me qëllim regjistrimin e vendimeve të marra në Asamblenë e Përgjithshme Vjetore nr. 30, kërkuesi i është drejtuar Gjykatës së Shkallës së Parë të Juridiksionit të Përgjithshëm Tiranë me kërkesën objekt gjykimi. Gjykata, në analizë dhe vlerësim të kësaj kërkesë, vendimit në themel të saj, si dhe praktikës së akteve të kësaj shoqate, vlerëson se kërkesa nuk është e bazuar në ligj dhe në statut dhe si e tillë nuk mund të pranohet. Për të arritur në këtë konkluzion gjykata mban në konsideratë parashikimet e statutit të KOKSH.

Kështu, referuar nenit 16 të Statutit, rezulton të jetë parashikuar procedura përkatëse për zhvillimin e Asamblesë së Përgjithshme Vjetore, si dhe e drejta e votës, duke specifikuar kushtet

që duhet të verifikohen për ushtrimin e saj, si dhe vlerën përkatëse. Konkretisht, rezulton të jetë parashikuar se:

1. *Asambleja e Përgjithshme mblidhet së paku një herë në vit për të miratuar raportin e aktivitetit, atë financiar si dhe buxhetin e propozuar, dhe është organi që vendos për çështje, të tilla si përcaktimi i fushave dhe i programeve të veprimtarisë, mbikëqyr dhe kontrollon rregullisht realizimin e tyre, shqyrton çështjet ekonomike, financiare dhe miraton aktet më të rëndësishme në lidhje me buxhetin e KOKSH-it dhe shpenzimet për vitin e ardhshëm, zgjedh anëtarët e organeve ekzekutive dhe vendos për çështje të tjera të parashikuara shprehimisht në këtë statut apo në Legjislacionin Shqiptar*

2. *Asambleja e Përgjithshme, përveç sa parashikohet në paragrafin 1 këtu më sipër, diskuton dhe aprovon ndryshimet që janë bërë në përbërjen e KOKSH-it nga mbledhja e mëparshme.*

3. *KE i propozon Asamblesë së Përgjithshme tri kandidatura për auditorin e pasqyrave financiare të KOKSH-it, ndër të cilët zgjidhet kandidati i cili merr më tepër vota nga Asambleja. Mandati i audituesit zgjat për një periudhë 5-vjeçare, përveç rasteve kur AP vendos ta ndërpresë atë më herët.*

4. *Asambleja e Përgjithshme përbëhet nga anëtarët e përmendur te Neni 10 (Përbërja më sipër.)*

5. *Organizatat Olimpikë që janë anëtarë të KOKSH-it dhe që kanë të drejtën e dy votave, mund të përfaqësohen në Asambleshën e Përgjithshmetë KOKSH-it me dy përfaqësues të cilët mund të jenë presidenti, dhe/ose sekretari i përgjithshëm, dhe/ose një anëtar i organit drejtues të saj (i cili duhet të jetë i mandatuar specifikisht për këtë qëllim nga organet drejtuese përkatëse). Për efekt sqarues, pavarësisht nëse Organizatat Olimpikë përfaqësohen nga një apo dy përfaqësues, ato kanë vetëm dy vota që mund të ushtrohen veç e veç ose së bashku.*

6. *Përfaqësuesit e një Organizate Sportive që kanë të drejtën e një vote, mund të jenë presidenti, dhe/ose sekretari i përgjithshëm, dhe/ose një anëtar i organit drejtues të saj (i cili duhet të jetë i mandatuar specifikisht për këtë qëllim nga organet drejtuese përkatëse të Organizatës Sportive).*

7. *Data e Asamblesë së Përgjithshme vjetore vendoset nga Komiteti Ekzekutiv, por ajo në të gjitha rastet do të mblidhet jo më vonë se sa data 30 Qershor e vitit përkatës. Ajo thirret nga Presidenti i KOKSH-it, dhe/ose nga 2/3 e anëtarëve të KE-së. Data, ora, vendi, dhe rendi i ditës së Asamblesë së Përgjithshme u bëhet e ditur anëtarëve, të paktën, 30 ditë përpara datës së caktuar*

8. Anëtarët e KOKSH-it mund të paraqesin propozimet e tyre për rendin e ditës pranë Komitetit Ekzekutiv të KOKSH-it, të paktën 20 ditë përpara datës së Asamblesë, përfshirë dhe datën e postës. Pas shqyrtimit të tyre, KE vendos për çështjet e rendit të ditës dhe njofton secilin prej anëtarëve të Asamblesë për rendin e ditës përfundimtar jo më vonë se 10 ditë para datës së Asamblesë.

9. AP drejtohet nga Presidenti i KOKSH-it dhe në mungesë të tij nga zv Presidenti. Kur edhe zv. Presidenti mungon, AP drejtohet nga anëtari më i vjetër në moshë i Komitetit Ekzekutiv i pranishëm në AP.

10. Jo më vonë se sa 20 ditë para datës së Asamblesë së Përgjithshme, Sekretari i Përgjithshëm ; KOKSH-it duhet t'i dorëzojë KVE-së listën e anëtarëve si dhe dokumentacionin që provon se ata kanë paguar kuotizacionin përkatës pranë KOKSH.

11. Jo më vonë se 20 ditë para datës së Asamblesë së Përgjithshme, të gjithë anëtarët e KOKSH duhet të dorëzojnë pranë KVE-së:

a) në rastin e Organizatave Sportive:

(1) një vërtetim nga gjykata, të datuar brenda 3 muajve nga data e Asamblesë së Përgjithshme, i cili specifikon organet drejtuese të saj;

(2) një ekstrakt nga Qendra Kombëtare e Biznesit, nëse është e aplikueshme; dhe

(3) informacion dhe dokumentacion në lidhje me Veprimtarinë Sportive që kanë zhvilluar gjatë vitit në përputhje me statutet e tyre.

b) në rastin e një përfaqësuesi të Organizatës Sportive të ndryshëm nga Presidenti dhe/ose Sekretari (në rastin e Organizatave Sportive me dy vota) apo të ndryshëm nga Presidenti (në rastin e Organizatave Sportive me një votë) si dhe në rastin e të gjithë anëtarëve të tjerë që janë persona juridik, mandatin e përfaqësimit nga organi drejtues përkatës.

Anëtarët që nuk dorëzojnë dokumentet e mësipërme nuk mund të votojnë në Asamblenë e Përgjithshme të radhës.

12. Jo më vonë se 10 (dhjetë) ditë para Asamblesë së Përgjithshme, KVE u dërgon anëtarëve të KOKSH-itme postë elektronike listën e anëtarëve që kanë përmbushur kriteret për t'u përfaqësuar(me apo pa të drejtë vote, sipas rastit) në Asamblenë e radhës.

Anëtarët e KOKSH-it kanë 5 (pesë) ditë kohë që të ankohen me shkrim, apo të bëjnë vërejtje të dokumentuara pranë KVE në lidhje me listën e anëtarëve të dërguar nga KVE, vërejtje të cilat duhet të shqyrtohen dhe për të cilat merret një vendim brenda 3 (tri) ditëve nga KVE. Vendimi iu komunikohet menjëherë elektronikisht anëtarëve me të drejtë vote si dhe Komitetit Ekzekutiv.

13. Në mbledhjen e Asamblesë së Përgjithshme, përfaqësuesit e anëtarëve të KOKSH-it duhet të kenë me vete dokumentin e identifikimit (pasaportë, kartë identiteti).

14. Përpara fillimit të punimeve të çdo Asambleje të Përgjithshme, KVE bën verifikimin përfundimtar të mandatave dhe të identitetit të anëtarëve dhe të përfaqësuesve të tyre që janë të pranishëm në AP, dhe bën publik raportin e tij përfundimtar në lidhje me anëtarët që kanë të drejtë vote në AP.

15. Asambleja e Përgjithshme konsiderohet e vlefshme në qoftëse janë të pranishëm më shumë se gjysma e anëtarëve me të drejtë vote, nga ku shumica e tyre të jenë nga Federatat Olimpikë dhe Organizatat Sportive të cilat ushtrojnë sporte që figurojnë në programin Olimpik. AP merr vendime me shumicën e anëtarëve të pranishëm me të drejtë vote, përveç rasteve kur parashikohet ndryshe në këtë Statut.

16. Nëse numri i anëtarëve pjesëmarrës nuk plotësohet, një Asamble e Përgjithshme tjetër duhet të mbledhet brenda 15 ditësh dhe do të jetë e vlefshme vetëm nëse janë të pranishëm jo më pak se 1/3 e anëtarëve të KOKSH-it që kanë të drejtë vote, nga ku shumica e tyre të jenë nga Federatat Olimpikë dhe Organizatat Sportive që ushtrojnë sporte që figurojnë në programin Olimpik. Nëse sërish kuorumi i nevojshëm nuk plotësohet, e njëjta procedurë do të përsëritet dhe këtë herë ajo do të jetë e vlefshme pavarësisht nga numri i anëtarëve pjesëmarrës.

17. Pavarësisht nga sa parashtrohet më lart në parashikimet e këtij Neni 16(Asambleja e Përgjithshme), një Asamble e Përgjithshme që ka në rendin e ditës së saj:

(1) zgjedhje;

(2) përjashtime të anëtarëve;

(3) mocione mosbesimi për organet e KOKSH-it;

(4) miratimin apo ndryshime në Statutin e KOKSH-it;

(5) miratimin apo ndryshime të Rregullores së KAS-it;

nuk do të konsiderohet e vlefshme nëse nuk janë të pranishëm të paktën 2/3 e anëtarëve me të drejtë vote, nga ku shumica e tyre të jenë nga Organizatat Olimpike. Pavarësisht nga fjalia paraardhëse, nëse kuorumi i anëtarëve pjesëmarrës nuk plotësohet, një Asamble e Përgjithshme tjetër me të njëjtin rend dite duhet të mbledhet brenda 15 ditësh dhe do të jetë e vlefshme vetëm nëse janë të pranishëm jo më pak se 1/2 e anëtarëve të KOKSH-it që kanë të drejtë vote, nga ku shumica e tyre të jenë nga Organizatat Olimpike. Nëse sërish kuorumi i nevojshëm nuk plotësohet, e njëjta procedurë do të përsëritet dhe këtë herë ajo do të jetë e vlefshme vetëm nëse janë të pranishëm jo më pak se 1/3 e anëtarëve të KOKSH-it, nga ku shumica e tyre të jenë nga Organizatat Olimpike.

18. AP shqyrton të gjitha çështjet e vëna në rendin e ditës dhe merr vendimet përkatëse.

19. Në për raste pandemie apo force madhore, apo kur kërkohet vendimarrje e shpejte, me propozim të Presidentit, Komiteti Ekzekutiv mund ti kërkojë anëtarëve të KOKSH të aplikojnë marrjen e Vendimeve Qarkulluese, duke ushtruar të drejtën e votës të shprehur me shkrim brenda një afati të arsyeshëm dhe të qartë. Përveç rasteve kur përcaktohet ndryshe në këtë Statut, vendimet Qarkulluese marrin fuqi nëse më shumë se 50% e anëtarësisë me të drejtë vote votojnë pro vendimit të propozuar në përfundim të afatit të përcaktuar.

Në kuadër të parashikimeve të mësipërme, në memorandumin e depozituar bashkëlidhur kërkesës, rezulton të jetë specifikuar “Shqyrtimi i dokumentacionit për të drejtën e votës në Asamble”, ku është sqaruar se KVE ka shqyrtuar gjithë dokumentacionin e dorëzuar në lidhje me të drejtën e votës dhe ka konkluduar në lidhje me të. Ndërkohë, nuk rezulton të jetë depozituar praktika përkatëse në këtë drejtim sikurse parashikohet në pikat 5-6 dhe 10-12, në mënyrë që gjykata të verifikojë të drejtën përkatëse të votës dhe ushtrimin e saj, e rrjedhimisht edhe kuroumin e nevojshëm.

Gjithashtu, rezulton se bashkëlidhur kërkesës objekt gjykimi, është depozituar shkresa me lëndë “Njoftim” nr. 195 prot., datë 15.05.2024 dhe nr. 195/1 prot., datë 18.06.2024, sipas së cilit rezulton se Komiteti Ekzekutiv në mbledhjen e datës 9 maj 2024 ka vendosur të thërrasë Asamblenë e 30-të të Përgjithshme të Komitetit Olimpik Shqiptar, duke specifikuar datën, orën dhe vendin e zhvillimit të saj, si dhe rendin e ditës. Ndërkohë, nuk rezulton që ky njoftim të ketë mbërritur tek anëtarët sikurse kërkohet nga pika 7 e nenit 16 të Statutit, pasi nuk ka asnjë dokument provues në këtë drejtim. Gjithashtu, referuar këtij njoftimi, rezulton se Asambleja e Përgjithshme është thirrur prej Komitetit Ekzekutiv, ndërkohë mungon vendimi përkatës i këtij të fundit.

Përveç sa më sipër, gjykata konstaton mosrespektim të Statutit edhe në lidhje me zgjedhjen e arbitrave të KAS. Konkretisht, referuar nenit 33 të Statutit rezulton të jetë parashikuar se: *“Pranë KOKSH vepron si organi i pavarur këshillimi dhe arbitrimi, Këshilli i Arbitrazhit Sportiv (KAS), i cili funksionon në bazë dhe në zbatim të Regullores së KAS-it, të miratuar nga Asambleja e Përgjithshme, e cila duhet të miratohet ose ndryshohet në përputhje me paragrafin 17 të nenit 16”*. Referuar Rregullores së Këshillit të Arbitrazhit Sportiv miratuar nga Asambleja e Përgjithshme e Komitetit Olimpik Shqiptar më datë 28.05.2022, regjistruar me vendimin nr. 5934/5 datë 16.02.2023 të Gjykatës së Rrethit Gjyqësor Tiranë, neni 6 rezulton se: *“KAS do të themelohet si një organizatë jofitimprurëse në formën e Qendrës. KAS do të themelohet 3 anëtarë themelues të cilët do të jenë dhe anëtarët e parë të organit më të lartë vendimmarrës që do të jetë Bordi Ekzekutiv.”*. Ndërkohë në nenin 5 të Regullores rezulton të jetë parashikuar se: *“KAS organizohet si më poshtë: A. Bordi Ekzekutiv i KAS; B. Drejtori Ekzekutiv; C. Kryetari i KAS; Ç. Mbledhja e Përgjithshme e Trupës së Arbitrazhit të KAS; D. Trupa e Arbitrazhit të KAS; DH. Sekretariati.”*. Ndërkohë, referuar kronologjisë së vendimmarrjeve të KOKSH të regjistruara me vendim gjyqësor, aktualisht rezulton të jenë zgjedhur tre themeluesit e KAS (referuar vendimeve nr. 5934/6, datë 23.06.2023 dhe nr. nr. 5934/9, date 04.04.2024 të Gjykatës së Shkallës së Parë të Juridiksionit të Përgjithshëm Tiranë). Por, nuk rezulton që të jetë themeluar KAS dhe as të ketë fituar personalitetin juridik, për sa kohë që nuk rezulton të jetë regjistruar në gjykatë, sikurse parashikohet nga nenet 13 dhe 14 të ligjit nr. 8788, datë 07.05.2001, *“Për Organizatat Jofitimprurëse”* i ndryshuar. Rrjedhimisht, në kushtet kur ende nuk është themeluar dhe regjistruar KAS, e për pasojë nuk ka filluar ushtrimi i veprimtarisë së tij, nuk mund të emërohen arbitrat të cilët janë pjesë e strukturës organizative të saj.

Referuar konstatimeve të mësipërme, gjykata konkludon se kërkesa e kërkuarit për regjistrimin e vendimit të datës 29.06.2024 të Asamblesë së Përgjithshme nr. 30 të KOKSH është e pabazuar në ligj dhe në statut, e si e tillë nuk duhet pranuar.

PËR KËTO ARSYE:

Gjykata, në bazë të Ligjit Nr. 8788 datë 07.05.2001 *“Për Organizatat Jofitimprurëse”*, Ligjit Nr. 8789 datë 07.05.2001 *“Për Regjistrimin e Organizatave Jofitimprurëse”*,

VENDOSI:

1. Mospranimin e kërkesës.
2. Kundër këtij vendimi mund të bëhet ankim në Gjykatën e Apelit të Juridiksionit të Përgjithshëm Tiranë, brenda 15 ditëve nga e nesërmja e njoftimit të vendimit të arsyetuar.

Tiranë më datë 19.07.2024!

GJYQTARE
ESMERILDA HABILI